

# **Filemoni**

## **Polokafo Filemoni ya lufuwa i fulo edaibo ha**

### *Homu Ha*

Filemoni ya idafa-adafa abi loto wa naibo we Kolosi numudoka hu unoto, ya Yesu holi hikito muto, emo numunalau ya Yesu weninala monolo nuba o-o abo ne. Wewa yakafo we ma nalalo houba-naba ononala linaibo we huliya Onesimusi ya meina fito, ononala lifa, ido idafala ma ugele lito holi uto, Lomu numudo u fedoto minoto Polo wa edaiye. Wa edaito, ya Yesu hala ukuwa lomuto, holito lula-hala li elepa ito Polo ana li faka lomo uto, aliga ya liwila oto Filemoni nedo ilifi moloto unaiye, loto Polokafo holito, ya lufuwa me ya ibo ne. Filemoni ya wewa lifimala hilili o edageto, ononala hofa linaiye, loto lufuwa me ya ito Onesimusi muto, ya lito uto Filemoni nedoka ya li elepa aiye.

### *Lo oloto molaibo ha*

<sup>1</sup> Aiyo, onona hounatefo lune-hane homobo we Filemoniyo, nemo Polo, Kilisto Yesu yagunu nalalo minobo we ya mono unatefo Timotite minoto, lufuwa me ya i fulo hedowe. <sup>2</sup> Hemogi, mono lemonate Apiyaki, onona hounatefo Aki-pusi, ido numunakau ya monolo nuba o-o abo wenina muki yagi walo.

<sup>3</sup> Metefo Gotidokati ido Wenaba Yesu Kilistodokati ya aifa li dowo lo ledaibo mona

ido you amena mona ya hemotinaloka mino betinaiye.

*Polokafo Filemoni yagunu holito Goti lomulomu aibo ha*

<sup>4-5</sup> Nemo hamena-hamena Menefo Goti lomuwobo, ya hemokafo Wenaba Yesu holi hikitoto luka-haka muto, ido fele weninala muki yagi luka-haka bi-bi o minanibo yagunu holito ya dowae, lalowe, loto hulika lomulomu o minowe. <sup>6</sup> Ido holi hikitanibo ha ya mono wenina auba ito lobi-lobi anibo nenako, Kilisto lulau mino edonibo wenina mono idafa dowa muki lumibo ya holifefe loto holinane, loto hemogunu lomulomu o minowe. <sup>7</sup> Ido hounanefo, hemo Goti fele weninala luka-haka bi-bi anibo yagunu lutinahatina li aila i betiyaninako, loto ake naba iyoto, nemo lune-hane yagi li aila i nedane.

*Polokafo Onesimusi hala lomuibobo*

<sup>8</sup> Feito luka-haka bi-bi anibo yagunu nemo Kilisto Yesu lulau mino edoto ya mona ma molananibo ya fetofeyo, loto ogofuto auba ito lohmunofa, ido fetoto lohomanogolowe. <sup>9</sup> E'e, lune-hane homobo yagunu haka lito lohomowe. Holiyo. Nemo, Polo, we kilofo minoto, Kilisto Yesu yagunu nalau minoto, <sup>10</sup> ya mono hipane Onesimusi, nalau minobo hamenalo ya mono hipane bulibo we yagunu haka lito lohomowe. <sup>11</sup> Wewa ya homu aga li faka lo hedamibo nefa, ido onesa me ya hemote nemote ade li faka lo ledanaibo we ya bulibo ne.

<sup>12</sup> Ido hemodoka liwila oto ilifi molobo, ya lunehanegi yaidana oto ilifi molowe. <sup>13</sup> Ilifi molobo,

ya Yesu hala ukuwa dowa yagunu nalau minobo ya ebaka libo neko, ane li faka ladi ne, loto holiyofa, <sup>14</sup>ido ane li faka lo nedanane, loto auba ito lohununowe, loto eleka hofu nedaiye. E'e, hemo haka dowa kito fetu fe nedanowe, loto ane li faka lo nedananibo ya dowa loto holinowe. Yagunu hemo O, lagetoyako fetu feyanogolowe.

<sup>15</sup> Ido wewa ya hamena fouma efoma hemodokati faiga nebo, ya liwila oto hemodoka loto onesa yaloti hemogi maina minomo yonogolaiye, loto holiyowe. <sup>16</sup> Onesa nalalo houba-naba ononaka li-li anaibo we yako minámiye. E'e, mono unakafo luka-haka munanibo we yagi ne. Nemo lune-hane mu minofa, ido nalalo houba-naba ononaka li minoto, Wenaba lulau mino edaibo ya mono unakafo minoto aibo we ya hemo luka-haka munanibo mona yakafo nemo lune-hane muwobo mona ya li yoima o edanaiye.

<sup>17</sup> Yagunu ya nemogi maina mono onona liyoibo hounanefo minowe, lananibo, ya wewa liwila oto anaido ya aiyo-weiyo lo nedananibo yamaidana oto aiyo-weiyo lo edo. <sup>18</sup> Ido mona nosámibo molo hedaife, ido idafa ma liwila oto homámito, ya nemokafo lifimala liwila oto humunogolowe. <sup>19</sup> Nemo Polo neimone anekafo lufuwa me ya iyowe. Lifimala liwila oto humunogolowe. Ido Gotikafo li nomuga waibo yagunu lifimawa liwila oto numunane, lanobo ya ukalo holitanane, loto fetu ladámanogolowe. <sup>20</sup> E'e, Wenaba lulau mino edoibo yagunu ane li faka lo nedanane, loto holiyobo, ya hemo Kilisto lulau

mino edoto mono unanefo minanibo ya lnehane li aila i nedo.

<sup>21</sup> Ido lufuwa me ya i fulo hedoto ya fetofeyo, loto lohomobo ha ya moda meyalomolanane, loto holiyobo yako minámiye. E'e, hemo ya lohomobo ha ya li fulo edoto, mulalo-mulalo fetofeyanane, loto holi minowe.

<sup>22</sup> Ido idafa mako ma lohomowe. Holiyo. Hemotina nemogunu holiti Goti lomu-lomu o minabo hawa ya Gotikafo holito hemotinaloka li liwila oto o nedanogolaiye, loto auba ito holiyonako, yagunu uwo unanobo eba ya lifefe lo nedo.

### *Onuwaloka ha*

<sup>23</sup> Ena mono we ma Kilsto Yesu lulau mino edoto maina nalalo minoibo we Epafalasi yakafoiyo-weiyo ha ya fulo hedo neto, <sup>24</sup> ido onona hounatefo Maki, Alistakusi, Demasi, Luku yagi ayaidana oti fulo hedo minae.

<sup>25</sup> Wenabate Yesu Kilsto aifa li dowa lo ledaibo monala ya weudina-lutina-hatinau mino betinaiye. Modae.

**Goti Ukuwala Hala**  
**The New Testament in the Lambau Dialect of the**  
**Siane Language of Papua New Guinea**  
**Nupela Testamen long tokples Siane-Lambau long**  
**Niugini**

copyright © 1997 Wycliffe Bible Translators, Inc.

Language: Siane-Lambau (Siane)

Dialect: Lambau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-19

---

PDF generated using Haiola and XeLaTeX on 22 Feb 2024 from source files dated 31 Aug 2023

293a493a-a8ae-5f22-be32-d1a5995e2a0e